

宋詩紀事

第二函
五冊

宋詩紀事卷三十二

錢唐 厲鶚 緝

錢唐 吳城 勘定

許景衡

景衡字少伊溫州瑞安人元祐元年進士高宗朝
官至御史中丞遷尚書左丞罷爲資政殿學士提
舉洞霄宮卒諡忠簡有橫塘集

寸碧亭

杖履尋常行樂處不論小逕與幽亭誰知蒼莽千峯外尚

有仙山一點青

東甌詩集

登仙巖寺

龍穴梅潭抱嶺斜憶曾同試雨前茶稍須林壑開雲葉便
倩兒童汲井花一別仙山空夢寐三年邊塞走塵沙合須
覓片閑田地鄰舍如儂有幾家

仙巖寺志

魯百能

百能吳興人元祐元年進士

醉仙崖

在秦州舊天水縣連鳳山

高倚青冥揖酒星山崖誰作醉仙形從來天地爲衾枕應
笑人間有獨醒

方輿勝覽

李 廌

廌字方叔陽翟人少以文字見知于蘇軾元祐初
軾知舉意在必得廌以魁多士及考章援程文以

爲薦無疑遂以爲魁旣拆號悵然出院薦竟無成
而卒有濟南集

友人董耘饋長沙猫筍薦以享太史公太史公輒作
詩爲貺因筍寓意且以爲贈耳薦卽和之亦以寓自
興之意且述前相知之情焉

節藏泥滓氣凌空薦俎寧知肉味重未許韋編充簡策已
勝絲委誑蛟龍短萌任逐霜刀重美幹須煩雪壤封他日
要令高士愛不應常共宰夫供

師友談紀

茗溪漁隱叢話李方叔稱范淳甫爲太史公以其爲國史修撰也

觀吳正獻眞

次公不許畫麒麟孝宣妙選知名臣拜公之像想風度乃

是雲臺子顏之文孫元豐天子建原廟玉宇萬棟臨端門
累朝名臣儼冠劒列聖御坐開乾坤修廊祕殿鎖春色彷彿
音容皆駿奔相君相業皆元元旂常彝鼎定書勛儀形
在歿侍神考英氣噩噩凝天關嗣皇方思服口美欲考辟
公觀列文君傳茲圖落人世世人遂得知瑜璠吾知袁公
固有後能平楚獄竟無冤召公甘棠猶不伐衛武之德誰
能諉君不見溫公之像滿人間願廣此圖令並傳

聲畫錄

寒食

千株蜜炬出嚴闔走馬天街賜近臣
我亦茅簷自鑽燧煨針燒艾檢銅人

飲襄陽沈氏家醉題侍兒小瑩裙帶

旋剪香羅列地垂
嬌紅嫩綠寫珠璣
花前欲作重重結
繫定春光不放歸

墨莊漫錄

驪山歌

君門如天深九重
君王如帝坐法宮
人生難處是安穩
何爲來此驪山中
複道連雲接金闕
樓觀隱隱橫翠紅
林深谷暗迷八駿
朝東暮西勞六龍
六龍西幸戕眉棧
悲風便入華清院
霓裳蕭散羽衣空
麋鹿來遊虛市變
我上朝元春半老
滿地落花人不埽
羯鼓樓高挂夕陽
長生殿古生青草
可憐吳楚兩醺雞
築臺未就已堪悲
長楊五柞漢幸免
江都樓成隋自迷
由來流連多喪德
宴安鴆毒因奢惑

三風十愆古所戒不必驪山可亡國

宋文鑑

遊寶應寺

雨後秋風入翠微我來仍值晚涼時
山遮日腳斜陽早雲礙鍾聲出谷遲
故國空餘煙冉冉舊宮何在黍離離
興亡滿眼無人語獨倚闌干默自知

詩林萬選

劉延世

延世字述之臨江人公是先生猶子少有盛名元祐初遊太學不得志築堂講業名曰抱甕

自題墨竹

酷愛此君心常將墨點真毫端雖在手難寫淡精神

畫繼

翡翠

避人忽起鳴衣桁掠水飛來立釣磯靜處欲畱看不足翠

光點破夕陽歸

後村千家詩

和孫公索酒

紫貂寒擁鼻綠螳細侵脣蓮燭當時事壺頭此日春

孫公談圖

種竹

梅蒸方過有餘潤竹醉由來自古云掘地聊栽數竿竹開

簾還當一溪雲

歲時廣記

句

靜室焚香盤膝坐長廊看畫散衣行

孫公談圃劉述之句趣尚之高有如此者

王履

履字坦翁開封人元祐初從父景琚南郊恩爲三班奉職元符上書編置新州入黨籍靖康初除相州觀察使扈駕被畱死之

臨難歌

曰琚按此歌宋史作李若水

矯首向天兮天卒無言忠臣效死兮死亦何愆

三朝北盟會編

喻陟

賀岷州太守种誼破鬼章

周后持盈日戎夷負固年廟謀期必勝閭畧制於先不假
天山箭行聞欂杜篇凱還俘馘獻圖像有凌煙

陝西通志

王純臣

賀岷州太守种誼破鬼章

黃塵匹馬捷書來且喜洮東破虜迴縱使隄西功第一未
聞生縛七渠魁

陝西通志

鄭至道

至道莆田人伯玉之孫元祐二年以雄州防禦推
官知天台縣爲政寬簡邑人悅服秩滿振戀因家
于台今廣龍鄭乃其裔也

劉阮洞

采藥歸來世代賒洞門方此埽煙霞碧流清泚弄明月翠
巘高低飄落花芳草已迷當日路白雲空想舊人家自慙
不是浮觴侶謾向人前醉帽斜

台州府志

王公亮

公亮字明遠

句

足穀醫還驗占桑夢已靈

王得臣歷史予第光輔鄰臣郡以經行應詔元祐丁卯賜第歸未幾因出壁馬傷甚十一日而卒年四十八王公亮明遠挽詞云云衆咸推服

范子正

子正忠宣公純仁長子

鶚按范忠宣二子正平字子夷次正思字子默范公稱過庭錄云六伯祖子正

七伯祖子夷是子正爲忠宣長子史不載故佚其名

孔林

漢陵玉匣盡秦山銀海空千戈百世後獨究先聖宮樹有
千年色門無數仞崇盛德包覆載遂順因所宗坐若顏閔
後頗聞鄒魯風撫膺感遺言零落涕霑胸

過庭錄

寄季顏師顏謫齊州

歷下故人今何在音書又已隔寒暄多年別後紛紛事何
日尊前細細論忍見風霜摧羽翮空教江漢瀉詞源聖朝
寬大超前古卽有恩光照覆盆

范公稱過庭錄六伯祖子正丞相長子有大才博學年甫三十二而卒有
文集百卷魯直爲跋其後兵火集散亡而魯直集中此跋亦闕其畧云士
之學期于沒而不朽君子之道百世以俟聖人故壽夭之際未嘗置言晁
鶴之短長故物不能齊也雖然有連城之璧操之甚栗中道而毀豈能使
人無繫于心哉范子正余不及友也予聞其人又得其言皆可傳後問其
所遊則司馬溫公愛之問其爲吏則年三十試吏單父方便者剝膚椎髓
取于民以自爲功子正以歲饑獨捨單父民錢十九雖沒可以不朽矣或
謂子正父祖皆名世士自宜如此應之曰文王割烹武王餽鼎叔旦舉而
用之管蔡不食誰強之則子正賢于人遠矣元祐二年三月庚午豫章黃
庭堅書

范致虛

致虛字謙叔建陽人元祐三年進士徽宗朝爲尚

書左丞靖康中知京兆府高宗卽位終資政殿學士

汎松江

黛潑峯巒安用染鏡澄湖面不須磨已驚張翰鱸如玉想
見西施髻似螺目斷樓高知水濶雲開山盡見天多吾家
本是煙波主好律漁翁一曲歌

吳江縣志

趙宗印

宗印汾州孝義人少爲僧范致虛令還俗授河東
制置使提義兵所向輒下王師敗於富平慟哭入
華山不知所終

題佛剎

七十勞生西復東鄉關在念感飄蓬大遼半歲九分盡全
晉一年千里空周名已亡無善政蔡童雖死有餘風華陰
乞食商山去巖谷幽尋四老翁

封氏編年范致虛在長安措置兵馬招募諸色人借補官資宗印本姓趙汾州人題詩佛刹云云安撫席益遣人追回與語大奇之薦之致虛令還俗爲節制參議宗印以僧爲一軍謂之尊勝隊以行童爲一軍謂之靜勝隊軍至陝州攻奪潼關

劉燾

燾字無言長興人誼之子元祐三年進士仕爲祕

閣修撰有見南山集

上庠錄元祐開馬涓張庭堅等四人擅名太學時號四俊劉燾湖州人年少亦自負初補太學生聞而慕之以刺謁曰不識可當一俊否涓等詭計以困之曰每誠當預爲一字限于程試中用之善者乃預既而程試燾請字涓等曰第一句用將字其時策問神宗實錄燾對曰秉史筆者權猶將也雖君命有所不受而況其他乎後果爲第一聞者服之因目燾曰挨屍俊

同友人汎舟至仁王寺

青秧出水細於鍼
嫩葉初齊綠未深
又是一年春欲盡
杖藜乘興足幽尋

前賢小集拾遺

題名伯埭斗野亭

地勢如披掌
天形似覆盤
三星羅戶牖
北斗挂闌干
晚色芙蕖靜
秋香桂子寒
更無山礙眼
剩覺水雲寬

庚溪詩話此詩題梁閒盡得斗野景物

菴畫溪

在長興

竹林深處杜鵑啼
兩岸青青草色齊
欲識人閒真菴畫
朱

藤倒影入清溪

湖州府志

宿華嚴院

夜宿霧山霧晨茹芝山芝年來嗜好衰但與青山宜登臨
意未愜出戶車已脂王事有期程愛山豈余私崎嶇田野
閒食寢將安之天寒未落日稅駕忽在茲二山已陳迹茲
處尤新奇翠竹與黃花一一對山扉對景自忘言若與予
心期眠雲飽山色那得困與飢山僧喜我來迎我畱新詩
我有愛山癖山僧知不知

吳氏詩承

郭三益

三益字慎求常州人元祐三年進士仙居令靖康
閒湖南安撫建炎初同知樞密院事

題仙居南峯寺藍光軒

山光竹影交寒輝下有碧浸吹漣漪沙痕隱隱白鳥去石

聲鑿鑿扁舟歸芝蘭發香禪味遠雲霧吐秀人家稀須知
春事不可挽杜鵑已遶林中飛

吳禮部詩話

寒巖

道人棲碧山雲居在空曲十年海潮音外物緣已熟更尋
妙高頂超然具幽築古木插空青寒筠抱巖綠時攜貝葉
書步入深林讀雲衣冷蕭條靜對含煙玉客來境非喧客
去境自足宵眠護神虎晝引穿花鹿庵中三昧語藥我貪
癡毒何當脫雙鳧藜杖追高躅

天台山志

馬存

存字子才鄱陽人因慕徐節孝道德寓楚州卒業
于其門元祐三年進士爲越州觀察推官有集